

Parlamentario Marlon Sneek:

Posiblemente for di entrante 1 di Juli por cuminza cremacion na Aruba

ORANJESTAD (AAN) – Den conferencia di prensa di fraccion di AVP, Parlamentario Marlon Sneek a referi na e ley di cremacion, cu e mes a presenta


y cu a wordo aproba den Parlamento.

Parlamentario Sneek a menciona cu e ley aki a wordo aproba unanimamente un aña y dos luna

pasa, pero te ainda e no por a bin na vigor manera mester ta, y door di esaki tabata tin un reunion dia 30 di April ultimo, di un ora di pregunta, cu Minis-

ter di Salubridad, den cual Parlamento a haya mas informacion riba e motibonan di e retraso.

E parlamentario a subraya cu e Landsverordening a



keda aproba, pero den esaki tin algun Landsbesluitnan cu mester wordo traha, entre otro con pa haya e permiso pa haci cremacion, cual ta e reglanan di seguridad cu mester tin, si e lugar unda e funeraria ta ubica ta bon, y esaki a keda den man di e departamentonan cu mester controla esaki.

Aunke por parce cu cremacion ta meseos tur caminda, cada pais tin su detayenan cu nan kier mira diferente.

Por ehemplo na Curacao un persona so tin un crematorio pa uso di tur esnan cu mester, pero na Aruba e ley ta habri e posibilidad cu tur funeraria cu kier duna e servicio extra aki, por aplica pa un permiso y esaki ta haci cu nan mester atende mas cu e detayenan cu nan mester tene cuenta cune.

Parlamentario Sneek por a compronde cu trahamento di e Landsbesluitnan a tuma hopi tempo y nan no ta cla ainda. No obstante, e Landsbesluitnan a gana caminda pa bay Raad van Advies y awor ta na Parlamento atrobe pa Departamento Huridico haci e cambionan cu e institucion menciona a sugeri, pa despues bay caminda pa Gobernador pa nan por wordo publica y por fin esnan cu kier haci cremacion na Aruba por haci esaki. Minister di Salud tin den su planning cu pa entrante dia 1 di Juli proximo por cuminza cu cremacion riba nos Isla.

Ya caba tin alomenos dos funeraria cu a pidi permiso y un di nan tin e mashin instalada caba, e parlamentario a duna di conoce.